



Trg pravde 10, 76100 Brčko distrikat Bosne i Hercegovine; web: jt-brckodistriktbih.pravosudje.ba; tel: 049/217-227; faks: 049/219-088; e-pošta: jtbd@jtbd.ba
Трг правде 10, 76100 Брчко дистрикт Босне и Херцеговине; web: jt-brckodistriktbih.pravosudje.ba; тел: 049/217-227; факс: 049/219-088; е-пошта: jtbd@jtbd.ba

SAOPĆENJE ZA JAVNOST

5. maj 2023.

Zbog prisilne udaje trinaestogodišnje kćeri Sedam i po godina zatvora za trgovinu ljudima

Tužilaštvo Brčko distrikta BiH dokazalo je optužbe protiv lica s inicijalima N.M. (37)* iz ovog grada zbog sumnje da je maloljetnu kćer prisilio na udaju za B.Š, za šta je od njegove porodice primio novčanu naknadu. Za trgovinu ljudima, predajom lica koje nije navršilo osamnaest godina života radi seksualnog i drugog iskorištavanja, N.M. je pred Osnovnim sudom Brčko distrikta BiH nepravosnažno osuđen na sedam godina i šest mjeseci zatvora.

Tužilaštvo Distrikta optužilo je N.M. da je u aprilu 2020. godine, u namjeri da pribavi protivpravnu imovinsku korist, nakon uzimanja novčane naknade od porodice Š, toj porodici predao svoju trinaestogodišnju kćer radi prisilnog stupanja u vanbračnu zajednicu. Nakon što je pobjegla, on je žrtvu uz prijetnje i uslovljavanja vratio porodici Š, a nakon novog bjekstva policija je maloljetnicu u zapuštenom stanju pronašla u gradu, poslije čega je smještena u namjensku ustanovu - zaključuje se u optužnici dostavljenoj Osnovnom судu Distrikta. U nastavku postupka, sud je u cijelosti potvrđio optužnicu kojom je N.M. optužen za krivično djelo trgovine ljudima (*iz člana 207a stav 2 Krivičnog zakona Brčko distrikta BiH*). Tokom glavnog pretresa pred sudom, Tužilaštvo je dokazalo optužbe protiv njega, pa ga je s tim u vezi, Osnovni sud za ovo krivično djelo nepravosnažno osudio na kaznu zatvora u trajanju od sedam godina i šest mjeseci.

Osim kažnjavanja počinioca, saradnjom Tužilaštva s Policijom i Centrom za socijalni rad Distrikta spriječeno je daljnje iskorištavanje žrtve, koja je institucionalnom zaštitom izmještena u sigurnu kuću. Saradnja nadležnih na ovom području redovno se provodi i putem lokalnog koordinacionog tima za borbu protiv trgovine ljudima, ali i državne udarne grupe u koju je Tužilaštvo aktivno uključeno. Procesuiranje počinilaca i istovremena zaštita žrtava trgovine ljudima, među kojima su najčešće maloljetnici, ostaje i dalje u fokusu djelovanja ovog tužilaštva.

*Preduzimanje radnji krivičnog gonjenja prema određenom licu ne znači da je to lice zaista i odgovorno za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom presudom ne utvrdi njegova krivica.